

# La LR ha entschavì l'onn giubilar per ses 90

Avertura cun radunanza e diversas occurrenzas festivas a Savognin

■ (anr/gc) In placat da Gioni Defuns, Trun, per ils 90 da la Lia Rumantscha (LR), ha embelli e rendì attent 51 delegadas e delegads e prest anc tants giasts sonda passada en la sala Grava a Savognin al giubileum da l'uniun tetgala da la Rumantschia. Quella ha avert ses onn giubilar cun la radunanza annuala e differents occurrenzas. Anc 50 ulteriuras en quell'ensaina suondan.

## Giubileum sco mument da reflexiun

Il parsura da la LR, *Vincent Augustin*, introducescha, constatond ch'ils 26 d'october 1919 hajan las uniuns rumantschas da lez temp fundà a Cuira la LR. Quai saja stà il resun sin il clom da Cassandra lezza primavaira en la pressa cun l'intent da far insatge cunter la digren dal rumantsch. Eminents Rumantschs hajan interprendì e cuntinuà cun blera lavur ed acziun las finamiras statuidas 1919. Quai vulan ins era mussar en il decurs da l'onn proxim tras diversas occurrenzas giubilaras, na organisadas da la LR, mabain tras ils Rumantschs sez. Concludì vegn l'atun 2010 cun ina gronda festa populara.

Il president ha enumerà ina retscha da postulats cuntanschids en favur dal rumantsch il davos temp e deplorà ch'ins n'haja betg implementà avunda ils instruments dads. Il rumantsch dettia igl usche-

ditg ch'el haja ina funcziun e vegnia duvrà. – En num da la regenza ha cuss. gov. *Barbara Janom Steiner* purtà salids e taxa questa radunanza giubilara sco chaschun per guardar en il passà, reflectar davart la situaziun preschenta e dar in sguard en l'avegnir.

## Delicata situaziun finanziaria

Il quint da la LR 2008 serra – tar entradas ed expensas da 3,5 milliuns – cun ina sperdita da prest 50 000 francs e la facultad è crudada per bunamain 100 000 francs en las cifras cotschnas. Tenor il pledader da la cumissiun da gestiun, *Paul Solèr*, è la situaziun finanziaria da la LR delicata, fertant che quella fetschia bain ses duairs ed haja schizunt pudì reducir la sperdita per la mesadad tenor budget. Quai agir dettia profil e duessia esser ina buna premissa per survegnir contribuziuns pli autas da Berna. – Per 2010 ha la LR elavurà plirs preventivs, dentant laschà acceptar be il reduci cun anc adina in considerabel deficit e mussà ora mesiras pussaivlas per spargnar custs. Tant il quint sco era il rapport annual ed il vast program d'acziun èn vegnids acceptads unanimamain.

## Tscherna d'in nov suprastant

Quest onn èsi stà da tscherner ils organs da la LR per il proxim trienni. Sco parsura è



Al podi da l'Arena Rumantscha (da san.): Rino Darms, Anita Simeon, Martin Gabriel (mainadiscussiun), Maria Sedlacek, Hansjörg Hassler e Rico Valär.

vegnì confermà *Vincent Augustin*, medemamain ils suprastants: *Men Janett*, Ardez; *Luzia Plaz-Sonder*, Salouf, ed *Erwin Vincenz*, Vella. Demissiunà aveva il giuven *Martin Cantieni*, Turitg. Per el ha l'Uniun da Rumantschas e Rumantschs en la Basa proponì ses president *Jon Carl Tall*, Zug, e la GiuRu (Giuventetgna rumantscha) *Clau Dermont*, Rueun. Cun 30 vuschs è *Jon Carl Tall* vegnì tschernì. *Clau Dermont* ha fatg 18 vuschs.

Ils suppleants *Erwin Ardüser*, Laax; *Marta Lemm-Peter*, Bever, e *Christ Dolf*, Vargistagn èn vegnids reelegids, sco er ils commembers da la cumissiun da gestiun – ils revisurs: *Paul Solèr*, Lumbrein, *Duri Sulser*, Domat, e *Doris Casty-Domeni*, Trin e sco suppleants *Gregor Spinaz*, Sur, e *Hermann Thom*, Susch.

## Quai e tschai

Al suprastant demissionant, *Martin Cantieni*, engrazia il president per la buna lavur prestada durant trais onns. Quel haja dà accents speziels. Il demissionant sez giavischa ina LR pli curaschusa, averta e giuvna. Gratulaziun exprima il parsura a Rumantschas e Rumantschs che survegnan quest onn premis dal chantun: quel da cultura: *Martin Derungs*, tals da reconuschientscha: *Maria Cadruvi*, *Gion Balzer Casanova*, *Carli Scherrer*, *Domenic*

*Janett* e *Giusep Capaul* e quels da promozion: *Marlis Candinas*, *Bianca Meyer* e *Rico Franc Valär*. *Gioni Defuns* declera il cuntegn dal maletg-placat ch'el ha fatg per la LR giubilara, integrond tant elements characteristics sco giavischavels per noss mund rumantsch. – Il secretari general da

la LR, *Urs Cadruvi*, è sa domicilià uss cun sia famiglia a Trin en terra rumantscha. Insaquants han giavischà a e da la LR d'esser pli emoziunala, cumbattanta, spontana e da ristgar, sco era da dir e pretender cun dapli dinamica tge che nus vulain per propi.

## Arena Rumantscha sco plattafurma da reflexiun

Suenter la radunanza da la LR a Savognin ha gì lieu là ina Arena Rumantscha. Tema: Il svilup dal rumantsch. L'istoricher da la LR, rector *Gion Lechmann*, lascha passar revista – a basa da sia vasta dissertaziun surlonder – tge tut che la LR ha interprendì dapi sia fundaziun 1919 per promover il rumantsch. El dat in sguard enavos, preschenta la situaziun dad oz e guarda en l'avegnir. Tut en tut ina bilantscha impositiva.

Cun *Martin Gabriel* sco moderatur han *Hansjörg Hassler*, *Rico Valär*, *Maria Sedlacek*, *Rino Darms* ed *Anita Simeon* preschentà, dilucidà e giuditgà divers aspects da la situaziun concreta cun er integrar il public. Ils trais observatur:

*Annaletta Semadeni*, *Toni Killias* e *Gion Lechmann* han nudà l'essenzial da la discussiun ed extrapolà las trais tematicas las pli impurtantas. Igl èn quai: cuntanscher e motivar il pievel rumantsch (la basa), projects, politica da linguas e scola(zion). Quels temas vegnan mintgamai discussiunads in ad in a chaschun da las occurrenzas en il decurs da l'onn giubilar.

Il di d'avertura da l'onn giubilar da la LR è vegnì concludì a Savognin cun in program musical e cultural en la baselgia da Nossadonna. L'Ensemble dal festival cultural Origen ha dà – sut la direcciun da *Clau Scherrer* – in concert festiv cun musica vocala da *Duri Sialm*.



Gioni Defuns declera ses maletg per ils 90 da la LR.

FOTOS G. CAPAUL